

## Merr werd joo e bisje krätsche derfe.

Om Fassenachtssunndaach hadde merr in Flerschem widder enn scheene Zuch. Unsern Fassenachtszuch iss halt e gut Mischung von kloone unn größere Trupps mett dolle Idee, von Musikgruppe, von mehr so – saacher merr mol - traditionelle Marschkolonne mett Markedenterwaache unn Helau-Rufe, wie se hauptsächlich von de Fassenachtsvereine aus de Nochberschaft vorgefiehrt werrn, unn dann nodierlich von de Offizielle von de Stadt unn vom Nannclub, die merr gonz gern sieht, weil die immer so scheene, schnuckelige Sache von ihrne Waache erunnerschmeiße.

Awwer grad weil de Zuch so schee iss, werd merr joo e bisje krätsche derfe: Um so en Zuch ze beschreiw, schreiwweise in de Zeidung immer, er wär enn närrische Lindworm. Ferr unsern Zuch stimmt dess bestimmt bis zum End von de Eisebohstrooß, awwer unne in de Hauptstrooß isses mehr enn gedaalte Reecheworm, so ooner, den de beim Gaddeumgraawe zufällig mettem Spate erwischt unn middedorchgeschnitte host. Doo konnsde nemlich seh, wie dess oone End in de Forch unn dess onner End uffem Hiwwel vor sich hie zappelt. Nor dass de närrisch Reecheworm in de Hauptstrooß in vier odder fünf Stickcher zerschnitte iss. Oiverstonne, ess war kalt unn windisch om Sunndaach unn doo sinn die ersde fuffzich, sechzich Nummern ziemlich schnell dorch die Hauptstrooß geloffe, weil die hadde schunn enn longe Weech hinner sich unn wollde inne Wertschaft odder hoom, jedenfalls ins Warme, während unser ooner, der aussem Fenster guckt odder uff de Balkon enausgeht, sich immer widder in de Stubb, aach mettem Schnaps, uffwärme konnt. Awwer monchmol hattsde zum Uffwärme halt siwwe odder acht Minutte Zeit – ja, so long warn die Pause –, in dene de iwwerhaupt nix vom Zuch gesehe host. Weil vorne die wollde aus de Kält unn machte Tempo unn hinne sinn die gonze Flerschemer, die mache halt longsom, werrn gefeiert unn kenne deshalb koon Ooschluss halle. Doo nutze aach die gonze Handys unn Ohrstecker nix.

Merr kennt villeicht doodraus e Lehr zieh: Macht de Zuchweech nechstjohr oo Strooß kerzer. Ess iss joo schee, wenn alle Flerschemer Leit de Zuch sehe solle, awwer wanner om End so zerfleddert iss, dassden immer widder mett de Aache suche mussd, isses joo aach nix. Wenn de Zuchweech kerzer wär, wär aach die Laafzeit ferr die Leit nit so long unn sie missde zuletzt nit so e Tempo mache. Unn dann kennt merr joo jed Johr die Stroße wechsele.

Wie schreibt merr bei som Gekrätsch om End? Ooner ders gut mett Eich moont!

Awwer ich habb noch en onnern Vorschlaach ze mache, der merr schunn om Senatsowend in de Sinn kumme iss: Doo iss doch dess Lied gesunge worrn: „Einmal Flora fahr'n, davon hab' ich schon als kleiner Bub geträumt ...!“ Doo kennt merr doch mett jedem Orde,

obs enn große odder enn kloone iss, e Nummer vergewwe, die merr on dem Owend noch ziehe kennt. Und wer ausgelost iss, der derf beim Fassenachtszuch als Senatsgast mett de Flora odder uffem Waache vom Nannclub dorsch Flerschem fahrn - unn doodemett det de Nannclub so em Pärche sozesaache stellvertretend ferr alle Senatorinne unn Senatorm die Gunn oodue.

Eiern Honnes